



[pièce 116]
a

RESPONSE.

AVX MOYENS DES HABITANS

du Bailliage de Gex, faisans profession de la Religion pretendue Reformée, contenus dans un Imprimé qu'ils ont fait contre les Curez & Catholiques dudit pais.

TOUTE la contestation presente se reduit, à sçavoir, si le Roy seant en son Conseil, & prononçant l'Arrest du 26. Januier dernier, de l'année presente 1662. sur tous les Chefs y contenus, a iugé legitiment, & avec Iustice, & s'il doit auoir son entiere execution. Les Habitans du pais de Gex de la Religion pretendue Reformée s'y opposent. Et pour moyens ils alleguent vne longue histoire de l'estat de leur pretendue Eglise Reformée remplie de suppositions & déguisements, qu'ils appuyent en suite de raisonnemens de Sophistes, dressez vray semblablement par leurs Ministres, qui s'estans estudiez de tout temps à renuerser le veritable sens de l'Ecriture Sainte, & tous les dogmes de l'Eglise Catholique par de semblables sophismes, croient s'en pouuoir preualoir près de nostre grand Roy, qui ayant desia oüy le rapport du fond de l'affaire, & des pieces essentielles, qui contiennent tout ce qu'ils en veulent induire encore à present, ne peut estre trompé ny ébloüy sur cette matiere.

Messieurs les Religioneux dudit pais de Gex, voudroient d'abord attaquer la procedure de M^r Bouchu Intendant de Iustice, & Commissaire en cette partie, à l'égard de laquelle l'on peut dire en peu de paroles. Premièrement, que ledit sieur de Bouchu, connoissant visiblement que les Arrests du Conseil de sa Majesté des 27. Iuin & 3. Aoust dernier 1661. reduisans lesdits Religioneux à n'auoir exercice de leur Religion qu'és lieux de leur establissement, & qu'ils n'en pouuoient pretendre d'autres, ny en plus grand nombre, que ce qui leur estoit prescrit, ou par le Traité de Nyon, autrement de Lauzanne de l'an 1589. ou par l'Edit de Nantes, il n'a point hesité d'en ordonner l'execution, nonobstant le pretendu partage, & l'opinion contraire du sieur de Fernex son adjoinct en la



commission, autrement c'eust esté rendre la decision de sa Majesté illusoire, & permettre vne suspension nuisible & iniurieuse à l'autorité de ses Arrests : Secondement, que l'euénement a fait voir qui auoit mieux iugé des deux, puisques sa Majesté ayant examiné le fond, & les raisons de cette Ordonnance, & de l'auis contraire dudit sieur de Fernex, a iugé nettement ledit partage, reduit lesdits Religioneux aux deux lieux d'établissement designez par ledit sieur Bouchu, destruit les Temples & ledit exercice dans les autres lieux, décidé tous les autres chefs sur lesquels il auoit prononcé, & mis par ce moyen toute sa procedure hors de voye de contestation. Ce qui deuroit suffire pour la destruction entiere de toutes les pretentions & raisonnemens que mettent auourd'huy en auant lesdits Religioneux.

Mais puis qu'ils veulent qu'on discute encore avec eux le fond de cette affaire, il faut premierement leur monstrier le tort qu'ils ont d'arguer d'iniustice ledit Arrest, & d'alleguer pour pretexte qu'ils n'ont pas esté entendus, & pour cét effet, il ne faut que leur en faire lire la premiere page, n'y verront-ils pas que sa Majesté informée des plaintes faites par les Catholiques dudit Bailliage, de la contrauention à ses Edicts & Declarations & aux Arrests de son Conseil y mentionnez, par ceux de la Religion pretendue Reformée dudit pais, & portées pardeuant les Commissaires de sa Majesté, & veu le procez verbal desdits sieurs Commissaires contenant les contestations des parties, leurs dires & responses de part & d'autre, avec l'Ordonnance rendue par lesdits sieurs Commissaires sur tous les points y contenus, & sur lesquels est interuenu partage, & ouy le rapport, elle a décidé nettement de sa propre bouche. Ainsi n'est-ce pas vne chose tout à fait ridicule, de mettre en auant qu'on ne les a point ouïs, & de pretendre que, nonobstant la loy inuiolable des procez de partage, qui doiuent estre iugés dans le mesme estat qui a produit le partage, sans pouuoir y adiouter aucune chose, de pretendre, dis-je, que ledit partage soit encore iugé de nouueau, & qu'ils soient receus à apporter les mesmes raisonnemens, déguisez d'autre sorte dans vn grand imprimé, sur lesquels sa Majesté soit obligée de se dédire, & d'en admettre les Conclusions, que l'on peut dire autant heretiques, en matiere de droit, que le sont ordinairement celles qu'ils tirent, en matiere de Religion, qu'ils veulent neantmoins faire passer pour bonnes, & legitimes.

Et pour faire voir plus clairement cette verité, puis qu'il est que-

stion de mettre encore au iour le fond de cette affaire, il en faut emprunter les lumieres de ce qu'à fait ledit sieur Bouchu sur les lieux, qui l'a mieux penetrée qu'on n'auoit fait iusques à present; en ce que, ayant connu que, de droit, sa Majesté pouuoit abolir entierement dans ledit pais de Gex l'exercice de la Religion pretenduë Reformée, tant en consequence du Traité de Nyon de 1564. fait entre les Bernois, & le Duc de Sauoye, que de celuy de Lyon fait entre Henry IV. & le Duc Charles Emanuel en 1601. Il a renuoié la Requeste des Catholiques par deuers sa Majesté, pour leur estre pournu sur ce point, qu'il a iugé estre arbitraire, & ne dependre que de la volonté de sa Majesté: Et attendu que par des raisons qui seront cy-apres expliquées, on les auoit tousiours reglez, par vne grace speciale, sur l'exemple de l'Edit de Nantes, il a ordonné, par prouision seulement, que conformement audit Edit, ceux de la Religion pretenduë Reformée n'auroient que deux Temples dans ledit Bailliage, & il s'est estably avec grande raison dans cette pensée, que ledit exercice leur pouuoit estre osté, sur deux fondements tres solides.

Le premier est, que par le traité fondamental, & sur lequel lesdits Religioneux du pais de Gex peuuent appuyer principalement tout leur droit pretendu d'auoir le libre exercice de leur Religion, qui est celuy de Nyon de 1564. le Duc de Sauoye ne l'a permis, que iusques à ce que, par la determination d'un general, libre & asseuré Concile accordé par les Princes & Potentats de la Chrestienté, il soit déclaré qu'elle forme de Religion l'on doit tenir, à laquelle determination lesdits Sujets pourront estre contraincts d'acquiescer, comme tous les autres: laquelle clause monstre euidentement la pensée du Duc de Sauoye, de n'auoir qu'une seule Religion dans ses Estats, & qu'il la mit exprés, pour auoir droit d'assujettir ceux pour qui on traitoit, qui estoient ses Sujets, aux Decisions de Foy du Concile de Trente, apres qu'il auroit esté publié, comme il le fut quelques années apres. Et en cet endroit, il est bon de remarquer, que ledit Traité qui ne fut conclu & signé à Nyon qu'au mois de May de ladite année 1564. eut meantmoins son commencement en l'année 1559. tant à Basle, qu'à Lauzanne, & que la conclusion n'en fut différée, que sur cet article cōcernant la Religion, laquelle, en vertu d'iceluy, deuoit estre reglée entierement par la determination d'un Concile general. Ce qui fait voir euidentement, que cet article auoit rapport à la conclusion que l'on attendoit du Concile de Trente; lequel, n'ayant point

esté publié lors de la signature dudit Traité, passoit encore, en toutes ses Decisions, pour vne determination future, ce qui suffit pour respondre en passant au beau raisonnement de ces Messieurs, lesquels se ioient encor d'ailleurs en ce point, de l'Histoire assez mal à propos, pour essayer de rendre ce Concile inualide, puisqu'il a tousiours esté vniuersellement receu pour les Decisions de Foy & de Religion, dont il est question dans ladite restriction. En effet, quoy que le Duc de Sauoye Emanuel Philibert n'ayt pas osé, par des considerations politiques, se seruir de ce droit, si tost apres la publication dudit Concile, le Duc Charles Emanuel son fils n'en à pas neantmoins perdu l'occasion; quand en l'année 1599. encouragé par le Bien-heureux François de Sales, lors Preuost de la Cathedrale de Geneue, il chassa entierement les Ministres, & tout exercice de ladite Religion pretenduë Reformée des Bailliages de Thonon, & de Ternier, compris dans ledit traité de Nyon: nonobstant que tout son Conseil, par vne timide politique, s'efforçast de l'en destourner, par l'apprehension de tout perdre, leur respondant genereusement ces belles paroles, *moins de biens & plus de Paradis*, paroles dignes d'un grand Prince, couchées & attestées dans les procez de la Beatification & Canonization de ce saint homme, & sans la guerre que ce Duc eût peu apres avec Henry IV. qui a produit le traité de Lyon en l'an 1601. & la cession, par iceluy, du Bailliage & Baronnie de Gex, il y eust fait vray semblablement la mesme chose.

Le deuxiême fondement est, que ledit Bailliage de Gex ayant esté cédé au Roy Henry le Grand par ledit Duc Charles Emanuel, avec autres terres comprises dans le susdit Traité de 1601. aux mesmes droits & conditions que luy, & ses predecesseurs l'auoient possédé: Il est constant que sa Majesté est en droit de se seruir dudit premier traité de Nyon de 1564. & en consequence d'iceluy de faire audit pais de Gex la mesme chose, que ledit Duc Charles Emanuel a fait és Bailliages de Thonon & de Ternier compris dans le mesme Traité, & ausquels ledit Duc de Sauoye auoit accordé, aussi bien qu'audit pais de Gex, la liberté de conscience, iusqu'à la determination d'un Concile, comme il est remarqué cy-dessus.

Que s'ils se veulent preualoir du second Traité de Nyon, qui fut fait entre les mesmes Bernois & le Duc de Sauoye en 1589. pour l'extinction d'une nouvelle guerre, & usurpation desdits Bernois, lors de laquelle ceux de la Religion pretenduë Reformée dudit Bailliage,

5

prireut le party de la rebellion, contre leur legitime Souuerain, en faueur des vsurpateurs, l'on peut au contraire en tirer, avec Iustice, deux conclusions opposées au droict qu'ils pretendent.

L'une, que par les termes dudit Traitté les Bernois, connoissans bien la force de cette clause du premier de 1564. par laquelle le Duc Emanuel Philibert ne laisse l'exercice de la Religion pretenduë Reformée dans les Bailliages de Thonon, de Gex, & de Ternier, que iusqu'à la determination d'un Concile, & se fondans seulement sur l'octroy déjà fait par le mesme Duc dudit exercice par ledit Traitté precedent, pour obtenir par leurs prieres qu'il püst auoir lieu seulement en trois Parroisses ou Villages du Bailliage de Thonon, & en autant de Parroisses du Bailliage de Gex, & en vne seule du Bailliage de Ternier: Il est constant que bien loin de pouuoir auoir dans toute l'estenduë dudit Bailliage ou Baronnie de Gex trente-cinq ou trente-six Temples, comme ils le pretendent, ils n'en peuuent, au plus, auoir que trois dans toute l'estenduë dudit Bailliage ou Baronnie de Gex, composée de trente-sept Parroisses, dont sa Majesté ne possédant que les deux tiers, l'autre tiers composé de douze Parroisses estant vsuré par les Geneuois: Il s'ensuit qu'en leur donnant deux Temples, ou deux lieux d'establissement dans cette partie que le Roy possède, on a satisfait audit Traitté, luy donnant lieu par prouision, sans preiudice du droict acquis par le precedent, voicy les termes de ce Traitté de 1589. art. 4. *Pource que pour gagner le cœur des Sujets, les bons Princes Chrestiens, comme est S. A. n'ont point accoustumé de forcer les consciences, jaçoit qu'elle ayt desiré establir la Religion Catholique, Apostolique & Romaine aux trois Bailliages, ce neantmoins sa benignité & mansuetude annüant à la requeste desdits Seigneurs de Berne, & en contemplation aussi de ce que les Sujets desdits trois Bailliages auroient de jades long-temps, par l'octroy & concession dudit feu Duc Emanuel Philibert pere de sadite Altesse, exercé la Religion de laquelle ils faisoient profession, durant les presents troubles de guerre, a esté aussi dit, conclu & arresté, que l'exercice de ladite Religion se fera & aura lieu, à sçauoir, en trois Parroisses ou Villages de chacun Bailliage de Thonon & Gex, & en vne Parroisse ou Village au Bailliage de Ternier tant seulement, à la nomination & choix de S. A.*

L'autre conclusion qu'on en peut tirer, est, que ce premier Traitté de 1564. est demeuré en sa force & vigueur, puis qu'il n'y a point esté dérogé par ce dernier; & consequemment, que le Roy est dans le

mesme droit d'abolir entierement ledit exercice dans ledit Bailliage de Gex, que le Duc de Sauoye dans les deux autres cy-dessus: non-obstant ce second Traitté, comme l'a tres-bien iugé ledit sieur Bouchu, renuoyant sur ce point les Catholiques vers sa Majesté, & n'accordant ausdits Religionnaires les deux Temples, que par provision.

Le Roy Henry le Grand estoit bien conuaincu de cette verité, sur l'exemple de ce qu'auoit fait le Duc de Sauoye dans les deux autres Bailliages, qui luy fut allegué par le grand François de Sales Euesque de Geneue, quand il vint à la Cour de France en 1602. le Roy luy ayant témoigné, qu'il auoit le mesme desir de bannir dudit pais de Gex l'exercice de ladite Religion pretenduë Reformée; mais que tout ce qu'il vouloit ne luy estoit pas possible, à cause de la dureré des temps, & neantmoins, pour y donner quelque commencement, il luy accorda la restitution de trois Eglises dans ledit Bailliage, avec leurs reuenus, qu'il osta lors ausdits Religionnaires.

Louis XIII. son fils, & son successeur, continuant dans le mesme dessein, rendit depuis en 1612. au Bien-Heureux François de Sales, le reste des Eglises ou Parroisses dudit pais, avec les reuenus d'icelles, dont iouissoient ceux de la Religion pretenduë Reformée, & pour leur faire aualler la pillule, & les empescher d'y apporter de la resistance, il leur permit de prendre des bois dans les communes, pour bastir des Temples, (cela s'entend, quant au nombre, selon les restrictions de droit, & quant aux lieux, selon qu'ils leur seroient designés par les Commissaires de sa Maiesté, conformément à l'Edit de Nantes, qui seruoit lors de reigle) & il se chargea de payer annuellement 3600. liures pour leurs Ministres, & Maistres d'Escole, au lieu du reuenue des Eglises qu'il leur ostoit; & pour les destruire peu à peu, & restraindre leurs Ministres au nombre porté par l'Edit: on ne leur payâ plus, depuis l'année 1615. qu'une somme modique pour l'entretien de deux Ministres, & deux Maistres d'Escole: Et finalement, on leur osta le tout quelques années apres; ce qui marque l'intention de ce grand Roy, d'en venir peu à peu à l'extinction entiere de leur Religion, se seruant de son droit, selon l'accroissement de sa puissance. Et il semble que l'acheuement en soit reserué au temps present d'une profonde Paix, pendant laquelle, le Roy, qui est sans contredit le plus puissant, & le plus redouté de tous les Monarques, peut vser de son droit sur ledit pais, ainsi qu'a fait le Duc de Sauoye

dans les deux Bailliages cy-dessus remarqués.

Ces fondemens posés, il n'est pas difficile de monstrier, que les Religioneux dudit Bailliage ne peuvent pas se preualoir de l'Edit de Nantes, comme d'un droit qui leur soit acquis, pour destruire ce premier droit du Roy, que les traités des Ducs de Sauoye avec les Bernois luy donnent, ny contraindre sa Maiesté à leur continuer le Benefice dudit Edit, puisque lors qu'il fut fait, & accordé par le Roy Henry IV. en 1598. ce fut seulement pour les lieux qui estoient lors sous son obeïssance, dans lesquels ce Bailliage qui ne luy fut cédé qu'en 1601. ne pouuoit pas estre compris, les Ducs de Sauoye en estant lors les Souuerains, qui seuls pouuoient y establir des Loix, autrement ceux de cette mesme Religion pourroient semblablement pretendre auoir droit d'establir les mesmes priuileges de cet Edit dans le Roussillon, dans l'Artois, dans la Lorraine, & autres païs, qui pourroient estre cy apres reunis à la Couronne : qui seroit vne pretention manifestement ridicule, & impertinente.

Ce n'est donc point par droit, mais de pure grace, si on s'est seruy de l'exemple de l'Edit de Nantes dans ledit païs, lors qu'on n'auoit point en main d'autre reigle, & que les traités particuliers des Ducs de Sauoye avec les Bernois, touchant la Religion dans ledit païs, ont esté comme enseuelis dans la Chambre des Comptes de Chambery.

Mais quand bien sa Maiesté seroit encore à present disposée de iuger par prouision selon l'Edit de Nantes, sans preiudice desdits Traités, comme ont fait en differens temps les Commissaires ou Intendants enuoyés dans ledit païs, M. le Mazuyer en 1611. M. de Machault en 1636. Et presentement M. Bouchu, lesdits Religioneux seroient encore bien loin de leur compte.

Premierement, sur la pretention qu'ils ont de se seruir indefiniment des Articles 9. & 11. dudit Edit, on peut raisonnablement distinguer entre les Articles, qui ont vne relation expresse, & en termes formels, aux temps antecedents, qui en determinent la force, & l'estendue, & ceux qui ont vne simple relation aux temps à venir, ceux de la premiere sorte ne peuvent iamais estre appliqués au païs de Gex, dont ils contiennent vne exclusion formelle, ceux de la seconde sorte n'ont pas cette incompatibilité particuliere, & y peuvent estre estendus, & y auoir lieu, tant qu'il plaira à sa Maiesté, & pour appliquer plus nettement cette distinction ausdits Articles, il faut en ob-

seruer les termes. L'article 9. dit. *Nous permettons aussi à ceux de ladite Religion faire continuer l'exercice d'icelle en toutes les Villes, & lieux de nostre obeissance, où il estoit par eux estably, & fait publiquement en l'année 1596. & 1597.* ne voila pas vne exclusion particuliere & formelle du Bailliage de Gex? à cause de la relation expresse aux temps antecedens, qui restraint la force, & concession de cet article à ce qui estoit antecedemment estably dans les terres de l'obeissance du Roy, dont ledit Bailliage estoit lors exclus. L'article 11. porte, *dauantage en chacun des anciens Bailliages &c.* Et à la fin du mesme article. *Voulons & entendons, sous le nom des Bailliages, parler de ceux qui estoient du temps du feu Roy Henry nostre tres-honoré Seigneur, & beau pere, tenus pour Bailliages, Seneschauſſées, ou gouuernement ressortissans sans moyen en nosdites Cours.* La substance de la concession de cet article, qui a relation expresse & limitée aux Bailliages ressortissans es Cours de Parlements du temps de Henry second, ne porte elle pas vne semblable exclusion formelle dudit Bailliage de Gex, qui lors n'estoit point ressortissant d'aucun Parlement de ce Royaume. Comme au contraire l'article sixieme qui porte que le Roy permet à ceux de ladite Religion pretendue Reformée viure & demeurer par toutes les villes du Royaume sans estre repris, vexez, molestés &c. L'article septiesme qui porte permission à tous Seigneurs, Gentil-hommes & autres faisans profession de la Religion pretendue Reformée, qui ont haute Iustice ou plain fief de Haubert, l'exercice de ladite Religion dans lesdites terres, tant qu'ils y seront residans &c. L'article huitieme qui porte qu'es Maisons de fief, ou ceux de ladite Religion n'auront haute Iustice, ils ne pourront faire ledit exercice, que pour leur famille seulement &c. Tous ces Articles ne contenant que des concessions, qui regardent purement l'aduenir & qui ne portent aucune exclusion incompatible, & inapplicable, comme les autres cy-dessus, audit pays de Gex, y peuuent estre introduits par grace & provisionnellement.

Secondement, pour oster à l'aduenir ausdits Religioneux tout sujet d'abuser du veritable sens desdits Articles 9. & 11. auxquels ils donnent vne fausse estendue, il faut remarquer que tous les Articles de l'Edit doiuent estre considerés comme vn total & dans toute l'estendue des relations & liaisons qu'ils ont les vns aux autres, en sorte que les Articles Generaux sont reductibles aux exceptions portées

tées dans les autres Articles; par exemple, L'article 9. qu'ils prennent pour leur principal fondement, lequel permet l'exercice de leur Religion ou il estoit estably en 1597. oultre l'exclusion particuliere cy-dessus à l'égard dudit pays de Gex, est restraint, pour tout le Royaume, par les Articles 3. 8. 10. & 11. car si lesdits lieux, ou estoit l'exercice de ladite Religion pretenduë Reformée en 1597. estoient appartenans aux Ecclesiastiques, ledit Article 3. en empesche l'effet, à l'égard des lieux appartenans ausdits Ecclesiastiques, en ces termes. *Ordonnons que tous ceux qui durant les troubles se sont emparez des Eglises, Maisons, biens, & reuenus appartenans ausdits Ecclesiastiques, leur en délaissent l'entiere possession, en tels droits, libertez, & seuretez qu'ils auoient auparauant &c. Deffendant aussi tres-expressement à ceux de ladite Religion pretenduë Reformée de faire Presches, ny aucun exercice de ladite Religion es Eglises, Maisons, & habitations desdits Ecclesiastiques.* Et l'article 10. qui suit immédiatement cet article 9. en empesche pareillement l'effect, à l'égard des lieux ou l'exercice de ladite Religion pretendue Reformée auoit esté introduit en consideration des personnes de ladite Religion, ou à cause de leurs fiefs, si lesdits fiefs se trouuent par apres possedés par des Catholiques, en ces termes. *N'entendons toutefois que ledit exercice puisse estre restably es lieux dudit Domaine, qui ont esté cy-deuant possedez par ceux de ladite Religion pretenduë Reformée, ou il auroit esté mis en consideration de leurs personnes, ou à cause du priuilege des fiefs, si lesdits fiefs se trouuent à present possedez par personnes de ladite Religion Catholique Apostolique & Romaine.* A propos de quoy il est necessaire de bien peser deux choses importantes à la question presente. La premiere, que hors les deux lieux designés par ledit Sieur Bouchu, pour l'exercice public de ladite Religion pretenduë Reformée, tous les autres Temples interdits par l'Arest du 16. Ianuier, & que ledit Sieur Bouchu à fait murer en consequence, sont tous en lieux appartenans, ou aux Ecclesiastiques, ou à des Seigneurs Catholiques. La deuxieme, que ladite Religion pretenduë Reformée n'a esté introduite audit pais de Gex, par les Seigneurs du Canton de Berne, qu'en consideration de leurs personnes, qui faisoient profession de ladite Religion, quand, l'ayant vsurpé sur le Duc de Saouye & y exerçans la Souueraineté, Ils ont contraint mal'heureusement ces pauures Peuples de quitter leur ancienne & vraye Religion, & d'embrasser la leur. Estans donc rentrez sous vn Seigneur haut Iusticier Catholique, qui est Monsieur le Prince, quine leur a iamais don-

né aucune permission dudit exercice, & qui s'y oppose formellement, il est constant qu'ils ne l'y peuuent pas continuer contre son gré, aux termes mesmes dudit Edit, article huietième, qui dit: *moyennant aussi que lesdites maisons de fief ne soient dedans les Villes, Bourgs, ou Villages appartenans aux Seigneurs hauts Iusticiers Catholiques, autres que nous, auquel cas ceux de ladite Religion n'y pourront faire ledit exercice, si ce n'est par permission, ou congé desdits Seigneurs hauts Iusticiers, & non autrement*: Et d'ailleurs estans retournés sous la Souueraineté du Duc de Sauoye, qui estoit vn Prince Catholique, & depuis sous celle du Roy, qui est le premier de tous les Roys Chrestiens, & le fils aîné de l'Eglise, qui n'est aucunement astraint audit Edit, à l'égard dudit pais de Gex, comme il a esté iustifié cy-dessus, Ceux de ladite Religion pretendue Reformée, dans l'estroite Iustice, n'y peuuent auoir aucun exercice, le Roy ayant bien plus de droit de contraindre ses Sujets dudit pays à embrasser sa Religion, que les Bernois vsurpateurs à leur faire suiure celle qu'ils professoient.

Il est donc vray de dire, que puisque d'une part, le Bailliage de Gex, en sa totalité, y compris ce qu'en tiennent par vsurpation les Geneuois, est de si petite estendue, qu'il ne contient pas la sixième partie du plus petit des Baillages designés dans l'Edit de Nantes, n'ayant pas plus de 4. lieües de longueur, sur deux lieües & demy de large; & que d'autre part, dans les Baillages de la qualité designée dans ledit Edit, Il n'y doit auoir que deux lieux d'exercice de la Religion pretendue Reformée, c'est vne surabondance de grace, quand sa Maïesté ayant donné des Commissaires pour reigler les choses de la Religion audit pays sur l'Edit de Nantes, ils ont accordé, sans preiudice des Traités, deux Temples ou lieux d'establissement dans la partie possédée par sa Maïesté, & l'on peut dire qu'ils ont excédé, en ce que, dans cette mesme partie, continuant encore par prouision à y estendre les priuileges dudit Edit, il n'y en deuroit auoir qu'un. Et mesme, en bonne Iustice, l'autre partie dudit Bailliage ayant encore dix Temples, on leur pourroit, selon l'Edit, oster ceux de Sergy & de Fernex, puisqu'il seroit vray de dire que sans ceux cy, & sans tous ceux abolis par l'Arrest du seiziesme Ianuier dernier, il y en auroit encore dix, au lieu de deux, dans ledit Bailliage, car, quoy que ce tiers restant soit sous les Geneuois qui l'ont vsuré, sous pretexte que c'est le Domaine de l'Euesque de Geneue, & de son Chappitre, cela n'empesche pas que la Sou-

ueraineté n'en appartienne au Roy, aussi bien que le reste de ladite Baronnie, puisque les predecesseurs du Duc Charles Emanuel l'ont possédée entiere & qu'il en a fait cession sans reserue, laissant par ce moyen à sa Maiesté d'en poursuivre la restitution, quand bon luy sembleroit, mais c'est vne affaire particuliere du Roy avec les Geneuois, que sa Maiesté sçaura bien démestler à present qu'elle en est informée.

Dequoy se plaignent donc ces Messieurs de la Religion pretenduë Reformée, apres vne grace si signalée de la permission qui leur a esté donnée de deux Temples dans la partie dudit Bailliage ou Baronnie de Gex possédée par le Roy? Quoy? ils pretendent qu'une manifeste vsurpation de toutes les Eglises dudit pais, basties d'ancienneté par les Catholiques, & lesquelles, par cette raison, ils ont esté obligez de restituer, conformément à l'Edict de Nantes, est vne legitime possession pour fonder autant de lieux d'establissement? qui a iamais ouïy parler d'une pensée si impertinente & si éloignée du vray sens dudit Edict, lequel oblige ceux de la Religion pretenduë Reformée, par l'Article 3. à la restitution desdites Eglises, & leur deffend d'y faire Presches, sans leur pourvoir d'aucuns autres lieux par compensation, bien loin de leur accorder, sur cette iniuste vsurpation, autant de lieux d'establissement, qu'ils occupoient d'Eglises, comme le demandent auourd'huy Messieurs de la Religion pretenduë Reformée dudit pais, appuyez du Deputé de Geneue, & mesme le Roy accordant à ceux de ladite Religion par ledit Edit de Nantes, (c'est en l'Article 11.) outre les Villes qui leur auoient esté données par l'Edict de 1577. vn second lieu de Bailliage, confirme encore ledit Article 3. par l'exception expresse qu'il adioust en ces termes: *fors & excepté pour ledit lieu de Bailliage, les Villes, esquelles il y a Archeuesché ou Euesché. Excepté aussi les lieux & Seigneuries appartenans aux Ecclesiastiques, esquelles nous n'entendons que ledit second lieu de Bailliage puisse estre estably, les en ayant de grace speciale exceptez & reseruez.* Ils veulent bien l'extension dudit Edict és poincts qu'ils croient leur estre favorables, & ils ne le veulent pas admettre en d'autres poincts qui ne leur plaisent pas.

D'ailleurs les lieux d'establissement doiuent estre designez par les Commissaires du Roy, & ils n'en ont aucun par cette voye, ils ne s'y sont iamais adressez, ils ont touïours méprisé l'autorité Royale, ils ont basti des Temples à leur fantaisie, & en tel nombre qu'il leur a

pleu, la pluspart mesme si près des Eglises, qu'ils interrompent, par leur chant, la celebration du Diuin Service, contre la disposition expresse dudit Edict, ils en ont erigé dans ce petit destroit iusques à vingt-cinq, & les plus anciens de tous sont de l'année 1618. long temps apres l'Edict de Nantes, qui leur estant mesme appliqué par grace, ne leur accordoit, tout au plus, & d'as le plus fauorable sens qu'ils luy pussent donner, que deux lieux d'exercice, & ils ont continué de bastir de temps en temps tous les autres, nonobstant les oppositions formées en Iustice par les Catholiques du pais, & au mépris des defences expresses qui leur en ont esté faites, tant par les Arrests du Conseil du Roy & de ses Cours de Parlement de Bourgogne & de Dauphiné, que par les ordonnances de diuers Intendants & Commissaires de sa Majesté, entr'autres de M. de Machaulx en 1636. qui ordonna qu'ils rapporteroient leurs permissions, & cependant deffences d'en bastir: depuis lequel temps, ils en ont basti plusieurs, particulièrement celuy de la Ville de Gex, au preiudice d'un Arrest du Conseil du 12. Feurier 1642. contradictoirement donné avec eux sur l'opposition des Catholiques, qui leur deffendit l'exercice de leur Religion dans ladite Ville, & les condamna aux dépens, & d'une nouvelle & expresse prohibition de M^r le Prince, Gouverneur de la Prouince, & Seigneur Temporel de ladite Ville, par son ordonnance du 12. Mars ensuiuant, sous peine d'estre punis comme infracteurs des Edicts, & perturbateurs du repos public.

Et mesme tout nouuellement quelques Ministres ont esté assez hardis & insolens de contreuenir ouuertement à l'Arrest du Conseil de sa Majesté, du 27. Iuin dernier, d'exciter les peuples à sedition, & de Prescher contre l'autorité Royale, pour raison de quoy informations ayans esté faites pardeuant le Bailly de Gex, qui ont esté remises audit sieur Bouchu, Intendant de Iustice, & Commissaire pour l'exécution d'ice-luy, apres en auoir pris la lecture, il auroit decreté prise de corps contr'eux: Ordonné en suite qu'ils seroient criez à trois briebs iours, avec annotation de leurs biens: ce que lefdits Ministres, l'un desquels est dans cette Ville de Paris, ont voulu déguiser par leur imprimé, en supposant faussement dans leur response au 26. Chef, que ledit sieur Bouchu auoit vsé enuers eux de cette rigueur, pour auoir Presché en d'autres lieux qu'en ceux de Sergy & Fernex.

Or toutes ces contrauentions ne peuuent estre qualifiées qu'une rebellion ouuerte, pour laquelle les Religionnaires dudit pais meri-

rent, en bonne Iustice, l'interdiction pour iamais de leur exercice, plustost que de leur accorder deux Temples, & sa Majesté en cela ne feroit que suiure l'exemple du feu Roy son Pere, de tres-glorieuse memoire, qui a priué plusieurs Villes, ou ceux de la Religion pretenduë Reformée auoient esté rebelles, des graces de cét Edict: ceux du païs de Gex l'ont mesme reietté en tout ce quine leur plaisoit pas, notamment en ce que, contre l'Art. 3. qui ordonne la restitution des Eglises, & le reestablisement de l'exercice de la Religion Catholique en tous les lieux où il auoit esté intermis, ils ont continué, par leur propre auenue, depuis ledit Edict, & iusques en l'année 1612. de faire leurs Presches dans les Eglises dudit païs. Et encore à present dans les Parroisses de Moins, Chancy & Auully, qui sont de la Souueraineté du Roy, ils y font leurs Presches, en occupent toutes les Dixmes & biens d'Eglise, & ne souffrent dans lesdites Parroisses aucun exercice de la Religion Catholique, non plus que dans les autres dudit Bailliage, vsurpées en Souueraineté par lesdits Geneuois, quoy que ceux de leur Religion ayent liberté de conscience, & iouissent librement de leurs biens par toute la France. Quelle apparence que le Roy puisse souffrir ces iniustices, à present qu'elles sont venues à sa connoissance?

Enfin, quel sujet ont de se plaindre ces Messieurs les Religioneux du Bailliage de Gex? on ne leur a point encore osté la liberté de conscience, on ne les a point priué du benefice de l'Edict, on leur accorde plus de Temples qu'il ne leur en donne: mais ils se plaignent, peut-estre, de ce qu'on leur oste la liberté de tenir les pauvres Catholiques du païs dans l'esclavage, comme ils ont fait par le passé, de ce qu'ils n'auront pas à l'auenir les moyens de mal-traiter & assassiner les Ecclesiastiques, comme ont fait plusieurs fois les principaux anciens des Consistoires dudit païs, dont la preuve est euidente par diuerfes Informations, qui sont encore entre les mains du Bailly de Gex, & qu'ils n'ont pû poursuiure, tant à cause de plus grandes menaces, que de leur grande pauvreté; cinq ou six Curez y sont morts de mort violente, les autres mal-traitez en sorte que, s'il ne leur en a pas cousté la vie, ils ont esté contraints de quitter le païs, & s'il n'y eust esté remedié par les Arrests du Conseil des 27. Iuin & 3. Septembre de l'année derniere, & particulièrement par le dernier du 16. Ianuier de l'année presente & par les ordonnances dudit sieur Bouchu, en consequen-

ce, M. l'Euesque de Geneue n'auroit pas trouué des Ecclesiastiques pour remplir les Cures vacantes.

Mais ce qui est, encore plus à considerer pour la destruction desdits Temples, est, qu'outre que c'est vne chose insupportable qu'il y en ayt vingt-cinq dans les deux tiers d'un si petit Bailliage, ce qui n'a point d'exemple en aucun autre lieu dans la France, S'il arriuoit de nouveau quelque guerre de Religion, & que les Geneuois, déjà vnus par alliance à plusieurs autres Estats, qui ont, comme eux, quitté la Religion Catholique, s'y mêlassent, ils pourroient facilement s'emparer de la partie qui reste au Roy, dans le milieu de laquelle est ce qu'ils en possèdent, fortifier lesdits Temples, & s'ils pouuoient surprendre le Fort de la Cluse, qui couure du costé du Midy le dit pais, ils y seroient si en seureté, que cinq cents hommes seroient capables de resister à vne armée de trente-mil hommes, ayant du costé du couchant les montagnes noires qui le rendent inaccessible, le Rosne & Geneue du Leuant, qui est vn puissant Rampart, & du Septentrion le Canton de Berne, qui est encore plus fort & inaccessible que les autres, & ils pourroient par ce moyen ietter dans le Royaume les Huguenots des pais voisins, les Geneuois, les Suisses, & les Protestans d'Allemagne.

Quand à tous les autres Chefs ou reglemens portez par ledit Arrest du 16. Ianvier dernier, dont lesdits Religioneux demandent la reuocation, il suffit de répondre en quatre paroles à tous leurs faux raisonnemens, que ledit sieur Bouchu, qui les a premierement formez sur les lieux avec grande connoissance de cause, apres auoir examiné toutes les pieces par eux produites & toutes leurs raisons, couchées par escrit dans son procez verbal, à l'audition desquelles il a vacqué pendant douze iours differents, & le susdit Arrest qui les a prononcez, le Roy seant en son Conseil, apres vne exacte discussion d'iceux, n'ont fait que suiure, ou les Arrests precedens, ou les Ordonnances dudit sieur de Machault de 1636. d'où ils sont la plupart extraits & copiez de mot à mot, & qu'ils sont entierement conformes à la Police commune du Royaume.

Par toutes ces raisons & autres à suppléer de droit, les Ecclesiastiques & Catholiques dudit pais de Gex esperent de la bonne Iustice de sa Majesté la demolition de tous les Temples qui ont esté bastis audit pais, dans vn esprit de rebellion, sans y auoir appelé aucuns Commis-

saies de sa Majesté, ou du moins, que si ceux de Sergy & de Fernex subsistent, ce sera seulement par prouision, sans preiudice des Traitez de Nyon, & tant qu'il plaira à sa Majesté, en confirmant le susdit Arrest du 16. Ianuier dernier; que les autres 23. déjà interdits & murez, seront sans cesse demolis, que les cloches dependuës & consignées aux Curez dudit pais, seront remises aux clochers desdites Eglises, les sauuegardes à l'égard desdits Ecclesiastiques & Catholiques reïterées, les despens reseruez par les Arrests de son Conseil, reglez deffinitiuement & adiugez ausdits Curez, & le Iugement de toutes les Informations cy-deuant faites à leur Requeste contre aucuns desdits Religionnaires, renuoyé pardeuant ledit sieur Bouchu Intendant de Iustice, pour y estre fait droit souuerainement, y appellant, dans les cas requis, des Graduez au nombre, & de la qualité de l'Ordonnance.



